

Istoire ein patué de Trétorrein

Prospé à Djian et Polite à Dzozé, l'aran dou tipe inséeparablo. L'aran prèske todzo einseimblo, bin ruramein l'on sein l'atro. On lou yayavé le demèro à Monta einseimblo. La demeindze, alanyan baré yeu demié cèinseimblé. En travau, l'alanyan dzamai sena lou dou. Se buetan-^s van daka po to émein, tan ka po faire de la contrebeinda. Po la seula afaire, yau l'aran pa duka, laré po la politike. Prospé, laré ristou, et, Polite laré gripiou. Te cein n'eimpatzé ke lan tepara zu dé zeimbara, yau sein sarian bin passau. On nué, ke passanyan amon di Tzaté à Mordzein, tzacon na vatze, se son fai akroché pè lou garde. Lé pren veré ke sté vatzé lé zaran pa à yeu. Lé zaran à on makenion de la Voude Lié. Lou garde lou zau menau bâ à Monta, eu tzaté, ein prazon. Bâ lé, lou zan condanau à na monstra ameinda. Kemein l'aran pa tan retzo, ne l'on, ne l'atro, lan dieu fela amon à Crête-Longue, afana sta ameinda à rason de dié fran pè dzo, pèr on. Vò peudé vò mueza ke amon lè, layan itau on bon tèrmo. Amon lé, on yeu fassavé faire teté sarté de travau. Ala pe la vegnie, pe lou cuerti, fosséraè raché, tzapla deu bou, enfin, to le travau ke se préseintavé. On dzo, on garde yeu di d'ala raché deu gran bou avué na grantà rasse, cein à râ d'on batimein. Si dzo eintie, fassavé pié on tan grou tzaou. Prospé, ple ruzau, sé buetau bravo à l'ombra dezo lé provaté deu batimein, teindiu ke Polite se trovavé ein plein solé. Avué sé tzaou, legura vò kemein mon Polite einsoûlavé de so-bra eintie. Kemein ne puavé daba pa mè tenin, di à Prospé. Tavui... Prospé, ne poi daba pa mè résista eu solé. Me faudra pâ créva. Tzandze se te plai, de lardzo avué mé, on dolin momein. Adon... ke na... ke répond Prospé, mé... sa nié, rêsto à l'ombra. Tè... tè rodzo, ton lardzo, lé eu solé. La politike n'a tepara min de bon lau, on é contrein de dré.

I. R.